



Tschädrios 2020

MS Tschädriosa



Melodie:
I bin en Italiano



Refrain

Oh mia bella bella bella Schänis,
I dem Dorf, da lauft immer nämisi!
Mit üsne Lüt, züchet mir dur d'Gass. Hey!
Mitenand in Schänis, da händ mir ganz viel Spass.



Zelten soll gelernt sein

Ich bin d Steiner Sina.
As Turnfest will ich higah.
Han extra es Zelt kauft,
weiss ja schliesslich, wie's det lauft.

Z'Obfelde pack ich s Zält us
und chume plötzlich nüm drus.
Wie söll denn das nur geh?
D'Zeltstange dihei lah!

Callboy Oli

Ich bi de Oli Marty.
Fahre Taxi anre Party.
Scho gli schribt mir denn einä,
öben träffe chöng diheimä.

Wo ich denn det achum,
luegt de aber ganz dumm.
Erwartet hett er sini Dame,
doch vertuscht hät er de Name.

Grossdädi Fritz

Ich bi de Fritz und duen hüt chochä.
D Elvira cha nur hoffe.
Spaghetti söll's hüt geh.
Cha fast nüt Falsches gscheh!

Bim Probiere schmöckts chli komisch.
Da merkets, was da los isch:
Parmigiano chas nöd sii,
da isch Schoppäpulver dri!

Truurspiel ade Uslumpetä

Ich bin d Narräfahnä.
Ich hang mit mine Gspahnä
idä schönste Ziiit vom Jahr
vorem Gmeindshuus – isch ja klar.

Letscht Jahr han ich kei Bock meh,
lah mich drum vom Wind grad mitneh.
S Narrävolk fühlt sich verarscht:
Truurspiel statt Fahnämarsch!



Töfflibueb Fritz

Ich bi de Fritz, ha min Töff abgholt.
Bim Präsentiere laufts nöd wie gwollt.
Links und rächts hauts en ufe Platz,
s git meh als nur ein Chratz.

Drum schrib ich jetzt am Steini
e Nachricht – s isch e gheimi:
„Hilf mir, doch s muess gheim bliübä.“
Fritz, da häsch am Falsche gschribä.



Beiweh

Ich bi de Joel Steiner.
Bi mir isch au öppis im Eimer.
Han amne Fuessballspiel mitgmacht
und ha tschuttet, dass es kracht.

Wägem Muskelkater tüend d Bei weh.
Am nöchste Tag gaht nüt meh.
Mini Schwö tuet sich zu mir gselle
zum mich vom WC wieder ufstelle.

Turtä-Transport


Ich bin d Miri Seliner.
Hol e Turtä und paar Berliner.
Bim Heiwäg winket all wie blöd.
Ich verstah das Ganze nöd!

Doch nach langem Suechä
merki, mir fählt ja de Chuechä.
Unversehrt und au nöd flach
stahter uf em Autodach.

Handy-Malheur

Ich bi de Reto Schwitter,
go bald uf Rumänie witer.
Genau jetzt isches gscheh:
Cha nüt ufem Display gseh.

Mis Handy isch jetzt kaputt.
Ich ha drum alles usdruckt.
Die Idee isch ja perfäkt,
30 Site mit Kontäkt!



Mitwirkende

Sepp Duff (Perkussion), Lea Giger (Gesang), Benjamin Mayer (Gitarre), Julia Riget (Gesang), Silvan Rosenast (Trompete),
Michelle Rubin (Trompete), Priska Schwitter (Posaune), Reto Schwitter (Sousaphon), Lea Steiner (Gesang), Remo Steiner (Trompete),
Felicitas Tresp (Gesang) und Livia Tresp (Euphonium)

Melodie:
Les Champs-Élysées

Knackärschli

De Schochä Fritz am Morgä früeh,
d Auge sind glaub nochli müed,
nimmt's mit em Luegä nöd so gnau
und leit sich gschwind ah.

Er fährt is Gschäft wie jede Tag,
doch irgendwie isch's hüt e Plag.
Was isch denn los? Das cha's nöd sii.
Es zwickt am Füdli!

Sin Arbeitstag isch bsunders sträng.
Die Hosä sind hüt schono äng.
D Elvira hät die sicher ächli z heiss
gwäsche gha.

Am Abig denn am Chuchitisch
klärt sich uf, was d Ursach isch.
D Elvira schüttlet nur de Chopf:
„Die Hosä sind mir!“



Z Schänis stromt nüt meh
Für's EW laufft's grad ächli guet:
S'isch dank Solar im Übermuet.
Doch idä Euphorie fählt's halt
a Konzentration.

Eines Tages denn en riese Schregg:
de ganzi Strom isch plötzli weg.
Niemert cha meh schaffä und
de Chochherd fällt us.

Au d Raiffisä finds ziemli blöd:
D Elektrotür öffnet sich nöd.
So wänds mit de Leitere
zum Fänster us gah.

Doch Rettig naht, e Lösig staht:
Da isch en rotä Chnopf parat.
Blöd nur, dass jede einzeln Schänner
de drucke muess.


Geburtstags-Fail

D Schänner trifft mer überall.
So au am Skiclub Maskäball.
D Michi Giger isch mit ihre Girls
au am Start.

Für sie isch's e spezielli Nacht.
S wird e riese Party gmacht.
Am zwölfi isch es denn so wüit:
Sie hät Geburtstag.

D Sandra hät scho öppis plant.
Vo dem hät d Michi gar nüt gahnt.
Für ihri Fründin staht d Sandra
sogar ufd Bühni.

Sie singt es Lied und schwingt e Red,
so dass es sicher jede gseht,
ussert d Michi, die isch nämmlig
gar nöd im Saal.



Melodie: Circle of Life

Refrain
Danke Powerfasnacht für die schöni Ziit!
Ihr schaffet bis tüüf id Nacht dass es geili Partys git.
Dur üchi Buebäträum wird Schänis zum Narrädorf.
Mir säget danke, danke Powerfasnacht!

Ab em Januar gseh sch paar Gstaltä
a jedem Fäscht idä Region.
Sie tauchet überall uf, chläbet Werbig ad Wänd
und verfolget ihri Mission.
Scho bald isch die ganzi Linthebni
völlig zueplakatiert.
Chasch sicher sii, dass z Schänis d Sackgass stattfindt,
hät au de Hinterletschti kapiert.



Jedes Jahr wird's no chli verreckter:
De Grössewahn triebt sie ah.
Drum tanzet mir unter de grösste
Discochugle vo Europa.
Vo SchmuDo bis Uslumpetä
sind sie ständig uf ihre Bei.
Im Notfall schlafet sie im Bäre am Tisch,
aber Hauptsach, sie mönd nöd hei.



Schänis isch im Usnahmezustand.
Jetzt händ au Narrä scho Wahlplakat.
So isch d Beteiligung bide Narrekönigswahl
grösser als bim Kantonsrat.
Öb Maskäball, Beizlifasnacht
oder de Umzug furd Chind:
Füf ungläublich Täg sind mir uf dä Gass,
well mir Schänner die bestä Maschger sind.

